

UMS dan KYS jadi rakan pintar

UB 11 09 2012 A7

Oleh YAP SIONG HAN
sionghan_yap@yahoo.com

KOTA KINABALU: Universiti Malaysia Sabah (UMS) dan Kolej Yayasan Sabah (KYS) menjadi rakan pintar setelah menandatangani satu memorandum persefahaman (MoU).

Naib Canselor UMS, Prof Dr Mohd Harun Abdullah berkata MoU itu dilihat amat signifikan dan penting sebagai faktor pemacu peningkatan kualiti dan kuantiti sumber manusia yang berkepakaran tinggi dalam bidang kejuruteraan dan teknologi maklumat serta bidang pengurusan perniagaan dan kewangan.

“MoU ini akan melengkap keperluan negara dalam pembangunan modal insan yang berdaya saing, kerjasama berdasarkan strategi lautan biru adalah sejajar dengan Pelan Transformasi Kerajaan bagi tujuan meningkatkan keberkesanan pelaksanaan



HARUN (dua kanan) bertukar dokumen MoU dengan Kamal sambil diperhatikan oleh Khalil (tengah).

rancangan pembangunan negara.

“Agenda utama dalam MoU ini adalah pembangunan

bersama dalam kokurikulum akademik yang mana UMS akan membantu KYS ke arah penawaran program-

program kursus pengajian Ijazah Sarjana Muda,” katanya di majlis MoU itu di sini kelmarin.

Harun berkata, sebagai permulaan, program Ijazah Sarjana Muda Teknologi Kejuruteraan yang mengkhusus dalam bidang Teknologi Automotif dan Teknologi Binaan Bangunan akan dikembangkan.

Katanya, Sekolah Kejuruteraan dan Teknologi Maklumat (SKTM) dan Sekolah Perniagaan dan Ekonomi (SPE) mempunyai kemampuan yang cukup tinggi bagi menawarkan kepakaran yang diperlukan KYS.

“Saya yakin SKTM dan SPE mampu menerajui usahasama untuk membantu pihak KYS dalam pembangunan dan pemantapan program-program Ijazah Sarjana Muda yang bakal diadakan dalam tempoh terdekat ini,” katanya.

Turut hadir di majlis itu ialah Pengarah Yayasan Sabah, Tan Sri Datu Khalil Jamalul, Lembaga Pengarah KYS, Datuk Kamal De Quadra serta tetamu kehormat yang lain.